

# «Colliar la furmaziun cun l'economia»

Pled d'avertura dad Elita Florin-Caluori

■ (anr/fa) **La giuventetgna grischuna dovra perspectivass professiunalas e l'economia chantunala impiegads spezialisads. La politica duai a l'avis da la presidenta dal cussegl grond s'engaschar per ina buna furmaziun.**

La Young Enterprise Switzerland (YES), in project da la Scola media commerciala a Cuira, sviluppa e venda programs da furmaziun economica per scolaras e scolars da tut las vegliadetgnas. La Sco'auta per tecnica ed economia a Cuira (Sate) ha sviluppa in project successur situà sin il nivel «Concurrenza dal business plan». «Quai èn mo dus exempels che mussan che la cumbinaziun pratica tranter furmaziun ed economia ha grond success», ha menziunà la presidenta dal cussegl grond *Elita Florin-Caluori* (pcd, Razén) ier en ses pled d'avertura per la sessiun da favrer, «questa colliaziun è fitg impurtanta, ella dat a la giuventetgna perspectivass en sias professiuns ed a l'economia las forzas spezialisadas ch'ella basegna.»

## Rinforzar ils uschenumnads roms Mint

Per cuntanscher questa finamira dependa i dentant sco ch'ella ha ditg ferm era da l'instrucziun da la generaziun giuvna: «Il bainstar da la societad ed il bainstar odiern en Svizra dependan per gronda part da las prestaziuns en la tecnica ed en las scienzas natiralas», ha ella cuntinuà, «perquai èsi necessari ch'i vegnian rinforzads ils roms Mint (matematica, informatica, scienzas

natiralas e tecnica).» La presidenta dal parlament grischun ha grondas speranzas che quai gartegia cun il nov Plan d'instrucziun 21: «La premissa per che quel possa avair il success spetgà è dentant che nus dettian als uffants da tut las vegliadetgnas in access captivant al mund multifar e fascinant dals roms Mint.»

## «Il mument è madir ed actual»

Elita Florin-Caluori s'è dumandada sch'il Grischun disponia era da la strategia necessaria per promover ils instituts da furmaziun suffizientamain. «Orientar permanentamain las purschidas da scolaziun a las pretensiuns actualas e futuras dal martgà da lavur è da grond'impurtanza strategica», ha ella constatà. A ses avis stuess il chantun Grischun surpender ina rolla activa areguard la promozion da l'economia, la furmaziun e la perscrutaziun: «Essend che nus vegnin confruntads cun il Plan d'instrucziun 21 e che nus avain concludì la lescha davart las scolas autas e la perscrutaziun è il mument per far quai uss madir ed actual», è ella persvadida, «promover l'economia en chantun, quai ans gartegia cun definir ina clera strategia che collia la furmaziun, la perscrutaziun e l'economia.» Cun savida e forzas spezialisadas per l'economia locala pon ins sco che la presidenta dal cussegl grond ha agiuntà rinforzar l'economia, «qua tras rinforzain nus er il Grischun sco chantun da furmaziun, da scolas autas e da perscrutaziun.»